

**Нұр-Сұлтан қаласы Мәслихатының тұрақты комиссиялары бірлескен
отырысының қаулысы**

Нұр-Сұлтан қаласы

2021 жылғы 8 қыркүйек

**Атқарушы органдардың
әлеуметтік маңызы бар азық-түлік
тауарларына
бағаларды тұрақтандыру жөніндегі
жұмысы туралы**

Атқарушы органдардың әлеуметтік маңызы бар азық-түлік тауарларының бағасын тұрақтандыру жөніндегі жұмысы туралы ақпаратты тыңдап, Нұр-Сұлтан қаласы мәслихатының бюджет, экономика, өнеркәсіп және кәсіпкерлік мәселелері және заңдылық, құқық тәртібі және жұртшылықпен жұмыс мәселелері жөніндегі тұрақты комиссиялары (бұдан әрі - Тұрақты комиссиялар) елорданың атқарушы органдары осы бағытта бірқатар жұмыстар жүргізіп жатқанын атап өтті.

Нұр-Сұлтан қаласының жергілікті мемлекеттік басқару органдарының алдында стратегиялық міндет - елорда халқының табысы мен өмір сүру сапасын арттыруды қамтамасыз ету тұр.

Қала негізгі азық-түлік тауарларымен 28%-ға өз өндірісі есебінен, 25%-ға азық-түлік белдеуінен жеткізу есебінен, 47%-ға республиканың басқа өңірлерінен және импорт есебінен қамтамасыз етіледі.

Сонымен қатар, мәслихат ағымдағы жылы әлеуметтік маңызы бар азық-түлік тауарлары бағасының айтарлықтай өскенін атап өтті.

Нұр-Сұлтан қаласы әкімдігінің 2021 жылғы 17 мамырдағы №502-1712 «Нұр-Сұлтан қаласында әлеуметтік маңызы бар азық-түлік тауарларына рұқсат етілген шекті бөлшек сауда бағаларының мөлшерін бекіту туралы» қаулысымен (бұдан әрі – Әкімдіктің қаулысы) өнімдердің екі түріне - күнбағыс майы мен жұмыртқаға рұқсат етілген шекті бағалар белгіленген.

Қалыптасқан жағдайды зерделеу мақсатында елорданың депутаттық корпусы елорданың сауда орталықтары мен базарларында болды. Аралау нәтижелері бойынша тұрақтандыру қорынан тиісті қарыздар бөлінген сауда желілерінде (дүкендерде) азық-түлік тауарлары Әкімдіктің қаулысымен белгіленген әлеуметтік маңызы бар азық-түлік тауарларына рұқсат етілген шекті бөлшек сауда бағаларының мөлшерінен асатын бағалармен сатылатыны анықталды.

Сондай-ақ, мәслихат депутаттары тұрақтандыру қорының жеміс-көкөніс өнімдерін сақтау бойынша көкөніс қоймаларына барды.

Оларды аралау барысында көкөніс қоймаларының бірінде көкөністердің ең көп дегенде бір апталық қоры ғана бар екендігі анықталды. Басқа көкөніс қоймаларында жеміс-көкөніс өнімдері немесе қандай да бір тамақ өнімдері мүлдем жоқ, олардың орнына әртүрлі жабдықтар, техника, жиһаз және басқалар сақтауға қойылған.

Осылайша, бүгінгі күні елорданың тұрақтандыру қорының нашар қалыптасуына және қандай да бір төтенше жағдай туындаған кезде олардың азық-түлік қауіпсіздігін қамтамасыз етуіне қатысты мәселелер туындап отыр.

Баяндалғанды ескере отырып, тиісті атқарушы мемлекеттік орган мен «Astana» ӘКК» АҚ тарапынан елорданың тұрақтандыру қорын қалыптастыру бойынша, сондай-ақ Әкімдіктің қаулысымен белгіленген әлеуметтік маңызы бар азық-түлік тауарларына рұқсат етілген шекті бөлшек сауда бағаларының мөлшерінен асып кетуіне жол бермеу бойынша тиісті бақылау болмағаны айқындалып отыр.

Отырыс барысында азық-түлік тауарларының импортына қатысты мәселелер көтерілді, өйткені өнім импортының жыл сайынғы ұлғаюы елорданың азық-түлік қауіпсіздігіне нақты қауіп төндіреді.

Сонымен қатар, отырыста Нұр-Сұлтан қаласының азық-түлік белдеуін қалыптастыру, жоғарыда көрсетілген мәселелер бойынша елорданың атқарушы мемлекеттік органы қабылдайтын басқарушылық шешімдердің тиімділігі мәселелері көтерілді.

Жоғарыда баяндалғанның негізінде, «Қазақстан Республикасындағы жергілікті мемлекеттік басқару және өзін-өзі басқару туралы» Қазақстан Республикасының 2001 жылғы 23 қаңтардағы Заңына сәйкес, Нұр-Сұлтан қаласы мәслихатының бюджет, экономика, өнеркәсіп және кәсіпкерлік мәселелері және заңдылық, құқық тәртібі және жұртшылықпен жұмыс мәселелері жөніндегі тұрақты комиссиялары **ҚАУЛЫ ЕТЕДІ:**

1. «Нұр-Сұлтан қаласының Инвестициялар және кәсіпкерлікті дамыту басқармасы» ММ-іне «Astana» ӘКК» АҚ-мен бірлесіп мыналар ұсынылсын:

Мемлекет басшысының ағымдағы жылғы 1 қыркүйекте тиімсіз баға белгілеу және азық-түлік тауарларын бөлуге қатысты бағаларға бірыңғай бақылау орнату бойынша берген тапсырмасын орындауды қамтамасыз ету;

Нұр-Сұлтан қаласы әкімдігінің 2021 жылғы 17 мамырдағы №502-1712 қаулысымен бекітілген әлеуметтік маңызы бар азық-түлік тауарларына рұқсат етілген шекті бөлшек сауда бағаларының мөлшерін арттыруға жол бермеу бойынша бақылауды жүзеге асыру;

қымбаттауға неғұрлым бейім азық-түлік тауарларының тұрақтандыру қорын қалыптастыру бойынша «Nur Otan» партиясының Жол картасының тиісінше орындалуын қамтамасыз ету;

тұрақтандыру қорынан ақшалай қарыз алған дүкендердің «Astana» ӘКК» АҚ-мен жасалған тиісті шарттар бойынша міндеттемелерін орындауы бойынша бақылауды және мониторингті қамтамасыз ету;

Нұр-Сұлтан қаласы әкімдігінің 2021 жылғы 17 мамырдағы №502-1712 қаулысына толықтырулар енгізу арқылы әлеуметтік маңызы бар азық-түлік тауарлары атауларының көпшілігіне рұқсат етілген шекті баға белгілеу және шаралар қабылдау;

аязға төзімділігі минус 70-80 градусқа дейін болатын 1 (бір) жылға дейін ауыл шаруашылығы өнімдерін сақтау мүмкіндігі бар заманауи көкөніс қоймаларын салу бойынша шаралар қабылдау және мәселені қарау;

дүкендердің жалпыға қолжетімді орындарда (стендтерде), олардың интернет-ресурстарында тұрақтандырылған бағалар бойынша сатылатын әлеуметтік маңызы бар азық-түлік тауарлары туралы ақпаратты орналастыруын бақылауды қамтамасыз ету;

өнімді сақтау және тиімді бөлу үшін қажетті жағдайлар жасау жөнінде шаралар қабылдау;

2021 жылғы 24 қыркүйекке дейінгі мерзімде азық-түлік тауарларының импорты үлесінің бар пайызына қатысты, оның ішінде олардың түрлері, экспорттаушы елдердің атаулары бойынша толық ақпарат беру;

тұрақты негізде елорда тұрғындары арасында бұқаралық ақпарат құралдарында, ақпараттық порталдарда тұрақтандырылған бағалар бойынша сатылатын әлеуметтік маңызы бар азық-түлік тауарларына қатысты ақпараттық-түсіндіру жұмыстарын жүргізу;

бір ай мерзімде қалалық мәслихатқа осы қаулыны орындау жөнінде қабылданған шаралар туралы ақпарат берілісін.

2. Нұр-Сұлтан қаласы мәслихатының бюджет, экономика, өнеркәсіп және кәсіпкерлік мәселелері жөніндегі тұрақты комиссиясы 2021 жылғы IV тоқсанда «Astana» ӘКК» АҚ қызметін жүзеге асыруға қатысты мәселені қарасын.

3. Осы қаулының орындалуын бақылау Нұр-Сұлтан қаласы мәслихатының бюджет, экономика, өнеркәсіп және кәсіпкерлік мәселелері жөніндегі тұрақты комиссиясына жүктелсін.

**Бірлескен отырыстың төрағасы-
Нұр-Сұлтан қаласы мәслихатының
заңдылық, құқық тәртібі және
жұртшылықпен жұмыс мәселелері жөніндегі
тұрақты комиссиясының төрағасы**



Т. Нәрікбаев